

# ДОСААФ-н балгъсна конференц

ДОСААФ-н Элст балгъсна комитет эклц организацан батрадж, дӓӓнӓ болн дӓӓнӓ техникеск, авиационн болн усна дӓӓнӓ халхин медрл ӧӧдл-уллгънд цӓӓлгъвр чледӱд дунд ясрулхд темдгтӓ сӓн кӧдлмш кев гидж келдж болшго. Болв, балгъсна комитет болн энӱнӓ шин ахлач ӱр Ефремов аш диглхӓс нег сар урд зӧв-ӓр ик кӱцвр кедж. Хойр джил юн кегдсн болна, тер тоотиг ӱр Ефремов тоолад, диглӓд, терӱгӓрн ДОСААФ-н Элст балгъсна конференцин делегатнриг маш икӓр „байрлулв.“

Энӱнӓ келсӓр болхла бу халгъар 5 дӧрлдӓн болснд 540 кӱн, велосипедн 2 дӧрлдӓнд 38 кӱн орлцдж. Терӱнас нань агъарар дӓврлт келгънӓс, атомн болн химическ аюлас бий-ӓн харсхин тускар 1200 кӱн, тер тускар 26 инструктор, 70 шофер хойрдгч болн гурвдгч

разрядта 40 шаху спортсмен белдгддж.

Балгъсна комитетин кӧдлмшт ик дуту-дунд бӓӓснь делегатнрин ӱгд темдглгдв. Эн джилин апрель сард ДОСААФ-н 2000-гар чледтӓ 29 эклц организацс бӓӓснӓс ноябрь сард 856 кӱӱтӓ 27 организац ӱлддж, ташр тавнь шинкн, балгъсна пормкомбинатд, сберкассд болн электростанцд бӱрддж, ӧсх биш нам багърдж. Акад болдж медгдх, болв тернь ӱнн!

Дакад болхла „дала спортсменс белдснь болн ӓмт сургъснь“ — теднь оньгдан газрмудт белдгдсн улс ирсиг тоод авад, бийснь белдсн болдж келджӓсн бӓӓдж.

Балгъсна комитет шин эклц организацс бӱрдӓхд оньган багъар ӧгсн учрар, горкомхозд, „Бурсельводстройин“ конторт, „1-е Мая“ артельд ода

чигн теднь уга.

ДОСААФ-н чледӓс взнос цуглуллгън ода бийнь ик хашнь йовна. 4000 арслнь взнос цуглулхдан 3041 арслнь цуглулдж.

Конференцд ирсн делегатнр белдврин кӧдлмш кедг баз угаг келдж, балгъсна комитетӓс, бу халгъна тир кедж ӧгтхӓ гидж сурв.

Дакад болхла эклц партийн, комсомольск, профсоюзн организацс ДОСААФ-н кӧдлмшт сулар орлцдгинь делегатнр темдглцхӓв.

Эн тоот дуту-дунд балгъсна комитет муугъар кӧдлмш кесн учрар харгъджана гидж Ефремов келв, болв цааранднь ю кех-йаахинь эн келсн уга.

Делегатнр йир сӓӓнӓр келдж, дуту-дундинь темдглдж шин комитет тер тоотиг тоолдж медтхӓ гидж заав.

БЕМБИН Тимофей.